

ESTATUTOS DO CONSORCIO DE BIBLIOTECAS UNIVERSITARIAS DE GALICIA

1.- Disposicións Xerais

1.1.- A Xunta de Galicia (a través da Secretaría Xeral de Investigación e Desenvolvemento, da Dirección Xeral de Universidades e da Dirección Xeral de Comunicación Social e Audiovisual), a Sociedade Anónima Centro de Supercomputación de Galicia, a Universidade da Coruña, a Universidade de Santiago de Compostela e a Universidade de Vigo constitúen un Consorcio denominado “Consortio de Bibliotecas Universitarias de Galicia” co obxectivo fundamental de mellora-la calidade dos servizos bibliotecarios a través da cooperación interbibliotecaria e coas finalidades seguintes:

- a) Crear e xestiona-lo catálogo colectivo das bibliotecas do Consorcio de Bibliotecas Universitarias de Galicia, de maneira que se incremente a efectividade da investigación e da ensinanza ó aumenta-los recursos bibliotecarios dispoñibles de forma inmediata.
- b) Incrementa-la produtividade científica ó mellora-lo acceso da comunidade universitaria integrada no Consorcio de Bibliotecas Universitarias de Galicia ás coleccións bibliográficas existentes a través da información bibliográfica e do préstamo interbibliotecario.
- c) Mellora-los servizos bibliotecarios e aforrar custos na catalogación, ó compartir recursos xa existentes, especialmente rexistros bibliográficos e de autoridades.
- d) Experimentar e fomenta-la aplicación de novas tecnoloxías da información ós servizos bibliotecarios e potencia-la formación tecnolóxica do persoal que traballa nas bibliotecas.
- e) Crear e xestiona-lo servizo de Publicacións electrónicas e bases de datos referenciais.
- f) Adquisición de recursos documentais, ben sexa mediante o establecemento de plans cooperativos de adquisicións e/ou de contratos de subministro de publicacións mediante convocatorias públicas comúns ás tres universidades.
- g) Conexión a redes nacionais e internacionais.
- h) Elaboración de estudos xerais sobre as necesidades bibliográficas comúns.
- i) Colaborar noutras iniciativas que xurdan de cooperación interbibliotecaria e de catálogos colectivos, especialmente no ámbito galego.
- j) Calquera outra iniciativa de cooperación interbibliotecaria que poida xurdir e posibilite ou mellore outros servizos das bibliotecas do Consorcio de Bibliotecas Universitaria de Galicia.

1.2.- O Consorcio de Bibliotecas Universitarias de Galicia, ten carácter voluntario e indefinido, sendo unha entidade de dereito público rexida polos seus Estatutos e de maneira complementaria pola lexislación vixente.

1.3.- O Consorcio de Bibliotecas Universitarias de Galicia ten personalidade xurídica propia e pode realizar actos administrativos, disposicións de bens, celebración de contratos, e en xeral, calquera outro acto para cumprir, de acordo coa lexislación vixente, os obxectivos establecidos nestes Estatutos.

1.4.- O Consorcio de Bibliotecas Universitarias de Galicia poderá incorporar outras institucións previo acordo do Consello de Goberno e aceptación destes Estatutos por parte da institución solicitante e pasará a integrarse no Consorcio de Bibliotecas Universitarias de Galicia con tódolos dereitos e obrigas do resto dos membros, e os seus representantes pasarán a formar parte do Consello de Goberno, na forma que se determine.

1.5.- O Consorcio de Bibliotecas Universitarias de Galicia terá a súa sede no “Centro Superior Bibliográfico de Galicia” situado na Rúa do Hórreo, nº 61 en Santiago de Compostela.

Por acordo do Consello de Goberno poderase cambia-lo enderezo da sede do Consorcio de Bibliotecas Universitarias de Galicia.

2.- Órganos de goberno

O Consorcio de Bibliotecas Universitarias de Galicia rexerase polos seguintes órganos:

- Consello de Goberno
- Comisión Técnica.
- Dirección Técnica.

2.1.- Consello de Goberno

2.1.1.- O Consello de Goberno: é o órgano superior do Consorcio de Bibliotecas Universitarias de Galicia e está formado por:

- Dous representantes da Universidade da Coruña.
- Dous representantes da Universidade de Santiago de Compostela.
- Dous representantes da Universidade de Vigo.
- Un representante da Dirección Xeral de Comunicación Social e Audiovisual.
- Un representante da Secretaría Xeral de Investigación e Desenvolvemento.
- Un representante da Dirección Xeral de Universidades.
- Un representante da S.A.X. Centro de Supercomputación de Galicia.
- O Director Técnico do Consorcio de Bibliotecas Universitarias de Galicia, con voz pero sen voto.

2.1.2.- O Consello de Goberno disporá dos seguintes cargos:

- Presidente: o posto será desempeñado por un dos representantes das Universidades seleccionado polo órgano de Goberno. Este posto será rotatorio e de carácter bianual.
- Vicepresidente: o posto será desempeñado por un dos representantes da Xunta de Galicia, seleccionado pola propia Xunta de Galicia .
- Secretario: o posto será desempeñado polo Director Técnico do Consorcio de Bibliotecas Universitarias de Galicia.

Ás reunións do Consello de Goberno poderán asistir os membros da Comisión Técnica, con voz pero sen voto.

2.1.3.- Calquera cambio na representación das Institucións que formen parte do Consello de Goberno do Consorcio de Bibliotecas Universitarias de Galicia comunicárase a este no momento de producirse.

2.1.4.- As atribucións do Consello de Goberno son as seguintes:

- a) Aprobación da Memoria de Xestión do exercicio .
- b) Aprobación de contas e orzamentos.
- c) Aprobación do plan anual de actividades.
- d) Admisión de novos membros do Consorcio de Bibliotecas Universitarias de Galicia.
- e) Nomeamento ou cesamento do Director Técnico.
- f) Modificación, interpretación e desenvolvemento dos presentes Estatutos.
- g) Aprobación dos regulamentos do Consorcio de Bibliotecas Universitarias de Galicia.
- h) Acordo de disolución e liquidación do Consorcio de Bibliotecas Universitarias de Galicia.
- i) Actos de disposición do patrimonio do Consorcio de Bibliotecas Universitarias de Galicia.
- j) Exercicio de accións xudiciais.
- k) Creación de comisións de asesoramento sobre temas relacionados cos obxectivos do Consorcio de Bibliotecas Universitarias de Galicia.

2.1.5.- O presidente do Consello de Goberno representará legalmente ó Consorcio de Bibliotecas Universitarias de Galicia nos actos, convenios e contratos nos que deba intervir e perante as Autoridades e Tribunais de toda clase, para o cal poderá outorga-los apoderamentos que estime oportuno.

2.1.6.- O Consello de Goberno reunirase en sesión ordinaria alomenos unha vez ó ano. Pódese reunir en sesión urxente por iniciativa do Presidente ou cando o soliciten como mínimo a terceira parte dos seus membros.

2.1.7.- O Secretario do Consello de Goberno redactará acta de cada reunión do Consello de Goberno.

2.1.8.- O Presidente do Consello de Goberno formalizará as convocatorias ás reunións do Consello do seguinte xeito:

- a) Convocatoria escrita incluíndo a orde do día.
- b) Antelación mínima, alomenos de 15 días agás as sesións extraordinarias que serán cunha antelación mínima de 3 días laborais.

2.1.9.- As sesións do Consello de Goberno quedarán constituídas cando se conte coa asistencia de, alomenos, a metade dos seus membros, máis o presidente e o secretario.

2.1.10.- Os acordos adoptaranse por maioría simple dos asistentes. No caso de empate, volverá a establecerse o asunto na seguinte sesión; se o empate persistira, a proposta será rexeitada.

2.1.11.- Deberá contarse co voto favorable de, alomenos, as dúas terceiras partes dos membros do Consello de Goberno para adoptar acordos relativos a:

- a) Proposta de admisión de novos membros no Consorcio de Bibliotecas Universitarias de Galicia.
- b) Proposta de modificación dos Estatutos e o seu desenvolvemento regulamentario.
- c) Nomeamento ou cesamento do Director do Consorcio de Bibliotecas Universitarias de Galicia.
- d) Modificacións na participación económica dos membros no patrimonio do Consorcio de Bibliotecas Universitarias de Galicia.

2.1.12.- Deberá contarse co voto favorable da totalidade dos membros do Consello de Goberno nos seguintes casos:

- a) Para incrementa-lo orzamento anual de gastos do Consorcio de Bibliotecas Universitarias de Galicia sempre que dito incremento supoña aumenta-la contribución dos membros.
- b) Para realizar modificacións na porcentaxe de participación dos membros no orzamento anual do Consorcio de Bibliotecas Universitarias de Galicia prevista no apartado 3.1.a) dos presentes estatutos.

A modificación das obrigas financeiras das institucións do Consorcio de Bibliotecas Universitarias de Galicia, requirirán autorización previa, de

forma expresa e por escrito, dos órganos de goberno destas institucións para o que estas se compromenten a verificalo coa urxencia necesaria respetando a lexislación vixente.

2.1.13.- Os acordos e actos do Consello de Goberno no non previsto nestes Estatutos, axustaranse á lexislación vixente sobre Réxime Xurídico das Administracións Públicas e do Procedemento Común. As súas decisións esgotarán a vía administrativa, e contra estas poderá interpoñerse recurso ante a xurisdicción contencioso-administrativa.

2.2.- Comisión Técnica

2.2.1.- A Comisión Técnica é o órgano de administración, proposta e asesoramento, coas facultades que lle asigne o Consello de Goberno.

2.2.2.- A Comisión Técnica estará integrada por:

- O presidente do Consello de Goberno, que será tamén presidente da Comisión Técnica. O presidente da Comisión Técnica poderá delegar as súas funcións no Vicepresidente do Consello de Goberno.
- Os directores de Biblioteca das Universidades do Sistema Universitario de Galicia.
- O Director Técnico do Consorcio de Bibliotecas Universitarias de Galicia, que actuará tamén como Secretario.

2.2.3.- Son atribucións da Comisión Técnica:

- A proposta do Programa global de actividades.
- A proposta do orzamento, tarifas e cadro de persoal.
- A proposta de revisión do orzamento.
- O informe da memoria de xestión e balance do exercicio anterior.
- A proposta de admisión de novos membros.
- A proposta de modificación de Estatutos.
- A proposta de Regulamentos do Consorcio de Bibliotecas universitarias de Galicia.
- A proposta de exercicio de accións xudiciais.
- A creación de grupos de traballo de apoio técnico.

2.2.4.- A Comisión Técnica reunirase, convocada polo presidente, alomenos unha vez cada trimestre.

2.2.5.- Para a toma de decisións da Comisión Técnica deberán estar presentes alomenos a metade dos seus membros, así como o Presidente e o Secretario. Os acordos adoptaranse por maioría de votos emitidos.

2.3.- Dirección Técnica

2.3.1.- A Dirección Técnica é o órgano encargado da execución dos acordos e do cumprimento dos obxectivos marcados polo Consello de Goberno así como das tarefas de xestión e planificación do Consorcio de Bibliotecas Universitarias de Galicia no marco dos acordos adoptados polo Consello de Goberno.

2.3.2.- O Director Técnico desenvolverá as seguintes funcións:

- a) Dirección e coordinación das actividades do Consorcio de Bibliotecas Universitarias de Galicia.
- b) Elaboración e presentación da Memoria de Xestión e rendición de contas do exercicio anterior.
- c) Elaboración do anteproxecto de orzamentos.
- d) Proposta e execución do Plan Anual de actividades.
- e) Análise técnica de admisión de novos membros no Consorcio de Bibliotecas Universitarias de Galicia.
- f) Proposta de regulamentos de operación do Consorcio de Bibliotecas Universitarias de Galicia.
- g) Proposta de operacións de crédito destinadas a cubrir necesidades de tesourería.
- h) Contratación de persoal.
- i) Xestión de pagos e ingresos de acordo co orzamento.
- j) Dirección do persoal do Consorcio de Bibliotecas Universitarias de Galicia así como contratacións de obras, bens e servizos.
- k) Establecer contactos con terceiras institucións e organismos para levar a cabo os obxectivos do Consorcio de Bibliotecas Universitarias de Galicia dando conta ó Consello de Goberno.
- l) Manter informado ó Presidente dos temas que excedendo as súas atribucións, pola súa urxencia, poidan afectar á consecución dos obxectivos marcados polo Consello de Goberno.
- m) Propoñer á Comisión Técnica a creación de grupos de traballo de apoio técnico.
- n) Calquera outra función que lle sexa delegada expresamente polo Consello de Goberno.

3.- Réxime de financiamento

3.1.- Achegas para gastos de funcionamento.

Para a realización dos seus obxectivos o Consorcio de Bibliotecas Universitarias de Galicia financiarase cos seguintes recursos:

- a) A Xunta de Galicia e as Universidades do Sistema Universitario de Galicia contribuirán anualmente ó financiamento do Consorcio de Bibliotecas Universitarias de Galicia cun importe mínimo de 305.950.000.-ptas. (1.836.993,50 euros) dos que 29.150.000.-ptas. (175.195.03 euros) se destinarán a financiar gastos correntes do Consorcio de Bibliotecas Universitarias de Galicia e 276.800.000.-ptas. (1.663.601,50 euros) a investimentos. A este fin cada socio contribuirá coa porcentaxe seguinte:

ENTIDADE	APORTACION A GASTOS CORRENTES (%)	APORTACION A INVESTIMENTOS (%)
Xunta de Galicia-Cons. Educación e O.U.	26	12,75
Xunta de Galicia-Cons. Cultura e C.Social	39	0
Xunta de Galicia-S.Xeral I+D	0	72,25
Universidades (UDC, USC e UVI)	35*	15*

*: cada universidade aportará a terceira parte

- b) Achegas, subvencións, doazóns, legados e axudas de todo tipo recibidas de institucións públicas ou privadas ou de particulares, previo acordo do Consello de Goberno.
- c) Cotas de utilización de usuarios.
- d) Calquera outra que lle corresponda percibir.

3.2.- Para a realización dos seus obxectivos, o Consorcio de Bibliotecas Universitarias de Galicia recibirá as seguintes cesións de uso por tempo indefinido do equipamento procedente das institucións que a continuación se relacionan:

- Consellería de Cultura, Comunicación Social e Audiovisual:
 - 3 Servidores de datos para Publicacións Electrónicas: 10.700.000 ptas.
- S.A.X. Centro de Supercomputación de Galicia: non contribuirá ó financiamento de ningún gasto do consorcio e únicamente cede o uso, por tempo indefinido, do material seguinte:
 - Servidor de datos GP7000: 38.448.530 ptas.
 - Software Innopac: 68.770.500 ptas

- 3.3.-** O consorcio ten a consideración de Administración instrumental, e, polo tanto, debe aplicárselle o dereito administrativo e estará sometido á Xurisdicción Contencioso-Administrativa. Concretamente deberá aplica-la normativa que en cada caso se indica para as seguintes materias:
- a) En materia de persoal: normativa sobre función pública ou Convenio Colectivo da Xunta de Galicia e demais normativa laboral para a cobertura de postos de persoal laboral.
 - b) En materia de contratación administrativa: texto refundido da Lei de Contratos das Administracións Públicas, aprobado polo Real Decreto Lexislativo 2/2000, de 16 de xuño, e a restante normativa complementaria.
 - c) En materia económico-financeira e presupostaria: Decreto Lexislativo 1/1999, do 7 de outubro, que aproba o texto refundido da Lei de réxime financeiro e orzamentario de Galicia, así como a restante normativa complementaria.

4.- Baixa de membros e disolución

- 4.1.-** A baixa de calquera das entidades que forman o Consorcio de Bibliotecas Universitarias de Galicia será notificada ó Presidente do Consello de Goberno quedando obrigada a devandita entidade a cumprir con tódolos compromisos asumidos ata a conclusión do exercicio orzamentario en vigor, sen que resulten prexudicados os intereses do Consorcio de Bibliotecas Universitarias de Galicia.
O Consorcio de Bibliotecas Universitarias de Galicia poderá exercer contra a entidade que o abandone sen cumprir tódolos compromisos asumidos, as accións legais que sexan pertinentes.
- 4.2.-** O Consorcio de Bibliotecas Universitarias de Galicia poderase disolver por acordo unánime das entidades que integran o Consorcio de Bibliotecas Universitarias de Galicia ou por imposibilidade legal ou material de cumprila súa finalidade.
O acordo de disolución deberá determina-lo procedemento a seguir así como a distribución do seu patrimonio e a liquidación de tódolos seus bens, incluídos os derivados da propiedade intelectual das bases de datos bibliográficas.

5.- Réxime Xurídico

O Consorcio de Bibliotecas Universitarias de Galicia, como entidade pública rexérase polos presentes Estatutos, os regulamentos que o desenvolvan e, de maneira supletoria:

- a) Pola lexislación de aplicación ás Universidades, en especial, a organización e funcionamento dos seus órganos de goberno.
- b) Pola normativa que regule os dereitos de propiedade intelectual.
- c) Pola lexislación que sobre bibliotecas e consorcios de bibliotecas poida dictarse no futuro.